

江西詩徵

江西詩徵卷七十二

南城曾煥賓谷編輯

國朝

藍千秋

千秋字長青號石塢宜黃人雍正四年由諸生薦
舉國子監典籍歷官戶部員外著有藍戶部集

古琴

五尺孤桐質成連海上心誰憐聲色古但覺指痕深四壁
延清籟虛堂豁素襟茫茫孰持贈松月爲幽陰

偕余東木遊石鵝

青城一片石落我山之隅霍靡茂草封鬱蓊林莽俱巨靈

江西詩徵

卷七十二

國朝八

歛疏鑿太樸傷鑪錘橫嶺堪隱几踵息每蘧蘧丹嶂萬古
色上覆碧穹廬諸峯羅睥睨儼擁專城居秋杪偕良朋躡
蹠排空虛奇姿邈冥契谷懷方起予睠盼遺八表豈唯塵
慮袪相視訂卜築共披霞外書

傅大聖涯過余山齋款畱信宿臨別有贈

抱病支離久索居旃驚剝啄敢茅廬十年知己重論劍信
宿畱賓共讀書元草披來終寂寞黃金散盡轉蕭疎相攜
笑訂名山約垂釣滄浪再訪予

鄧士錦

士錦字太初南城人雍正四年以諸生保舉孝廉
任瓊州教授著有來園集

梅關

秋老梅關秋氣清
天風樓閣下鐘聲
雁回人遠情何限
此是離鄉第一程

卽事

天涯羈夢夜悠悠
前寄平安得到不
海月一輪家萬里
燈前兒女語瓊州

夜坐東立夫

十年不見履雙過
萬里相思憶女蘿
往事悔從孤榻得
還家夢向隔年多
時名衮衮諸公俊
宦轍勞勞兩鬢皤
會憶寒山風雨夜
與君徙倚歎蹉跎

喜蕭警廬來粵

薄宦仍羈旅簾旌暝色催風花雙屐罷湖海一人來狂欲
開眉鏤談深燼燭灰莫愁宵寂寞月上共徘徊

卽事

候蟲鳴壁一燈青秋簟涼生不耐聽一局枯碁消夜課年
來最怯五更醒

登上封寺贈住持雲菴

到此諸峰盡一峰峰上峰僧房聽落葉客夢到孤松天近
星辰大壑深烟霧封我來叅叩罷正派是南宗

病中

掩關已多日流年樂裏旁老知秋信早病覺道心長夜靜
蟲聲響天清雁影翔我曾抄肘後無著是良方

客黎川別涂儒上

清絕琴尊地苔衣綠正肥纔逢三月暮又逐一帆歸人世
無知已誰人憶采薇相思今夜發江燕故飛飛

章山寺

偶爾經行處逢僧話石叢茶甘清澈底春色淡連空講磬
生虛白吟龕落小紅了然喧寂外風暖有飛蟲

鄧文錦

文錦字質君南城人

碧濤巷

翛然塵外境曲徑可幽居夕照蘿陰合春山舊雨餘鐘聲
千嶂裡花氣一簾初風起飄衣袂臨溪好釣魚

潘安禮

安禮字立夫號東山南城人雍正五年進士官刑
部員外郎乾隆元年召試博學宏詞第二人授編
修遷諭德卒著有東山草堂集

秋懷

四序更代謝衰榮相倚伏金風扇朱明零露團白玉蟋蟀
鳴前除空庭憂深竹黃昏微雨過蕭條散寒綠起坐不成
寐展書燒短燭遠人千載心安與世局促

秋風肅天地踈槐透清陰良辰發奇賞百籍手自斟羈角
奉六經萬象羅飛沉雜誦三十年蠡測溟渤深天上無頑
仙御風此中尋老人能勤學術武亦自歆閒房媚幽獨意

慨無古今嗒然忘言初輕颺響空林

石蘭生空谷婉孌有芬芳綠葉冒清露紫莖垂珠英豈不
貴自保榮若白玉堂幽意隨衆草掩冉含孤光白日忽西
匿誰與從風揚

逍遙崧山陽杳然望崑墟翩翩青鳥使中有琅玕書玉女
導我前白頰雙鬟姝翡翠巢珠林采鸞戲清都元雲何飄
飄絳樹千萬株處妃怡令顏知我靈根殊願言解纓佩蹇
修吾誰俱

噉噉雲中雁飛鳴戀儔匹周周飲於河銜羽避顛躓美人
隔秋水幽姿抱冰雪緘憶向千里蒼茫烟霧失中心惄如
飢青松指白日

飄風從西來吹我窻前樹落葉隨乾雨
槭槭如有訴榮華易彫枯荆棘在中路
鼎鼎百年身新人忽成故猿鶴等沙蟲
賢愚莫能度仙人浮邱生渺然墮烟霧

寄懷徐大鴻寶

籍甚徐高士翛然臥故園阮途應有淚
郢斲更無言疎雨橫孤艇殘陽下古原
風塵京洛客心事與誰論

送表弟禹軒南歸

露點庭蕪邊雁飛不堪旅邸話南歸
十年薄宦新霜幾千里征帆舊褐衣
江上芙蓉秋草莫尊前兄弟白雲遲
家書憑寄將雙淚身世天涯共落暉

佛手柑

晴雪玲瓏映瑤席黼黻白定標清格維摩一室現黃金垂
手珠林度空色讀罷南華香著衣旃檀薝蔔未應希畫屏
斗帳破昏夢月掛海宮天露霏江南霜後多瓊蕊楚客含
情向千里松窓柘館木奴荒指點緇塵隔烟水

長歌行贈梅功升

朔風獵獵摩天揚層谷戢戢夜雨霜誰報浮雲來駿踠雄
雌劍合雙鴛鴦十載夢君憶君面燕臺歲暮驚相見彈指
流年白髮新開尊素月榮光禱天子特詔起通儒殿前作
賦飛瓊琚治行已曾推卓茂高文還復用相如君才有源
學有祖臨川門似羅三古蒼精馬血錫崆峒天廟龜茲陳
簋簠飲君酒惜君才承明著作舍汝其誰哉長歌不能盡

起舞重徘徊驪駒一曲送君河上去明年遲汝驂鸞吐鳳
緩步凌雲臺

舒慕芬

慕芬字蘭軒號石門靖安人雍正四年以薦舉官
奉賢知縣少與弟慕芳齊名著有花萼集

北蘭寺

寺門山色蘸江流曲徑疎籬分外幽看竹客歸雙屐雨尋
詩人坐一亭秋

楊錫紱

錫紱字方來號蘭畹清江人雍正五年進士授吏
部主事歷官兵部尚書都察院右都御史提督漕

運卒謚勤懃著有四知堂集

葵花

暑雨山城足園葵長及簷丹誠惟一點紅日每先瞻露重
恩同渥風和意亦恬世間閒草木向背苦相兼

夜意

河水明如練風帆靜不張蟲聲經露濕月影渡波涼計日
秋將半懷人夜未央小山看漸近到及木樨黃

夕陽

一棹秋風裏行行又夕陽還飛鴉影亂罷舞柳絲黃客意
銜山急帆陰臥水涼何人方獨立覓句向蒼茫

螢

江世言集 卷一 二
風前雨後往來頻入幔依簾解近入剛有流光能自照已
忘腐草是前身

由鹽城舟行過馬家蕩暮抵山陽之車家橋

淺水輕橈左右湖寒風吹絮起菰蒲颺君脫盡烏紗氣得
似輕鷗自在無

夜舟

入夜鍾吾道微風一葉舟徐吟遲月上獨坐看星流野濶
烟無際波閑釣未收逝將謀小隱生事老羊裘

梁王城

寂寞荒榛裏巋然有舊城烽烟千古劫草木萬山兵壤堞
餘殘照寒鴉落暮聲年年迴棹處憑弔不勝情

安東作

近郭河聲怒沿隄草木多清宵聞雁鷺白日走蛟鼉補救
功需亟瘡痍氣若何誰膺司牧寄高臥盼庭柯

桃源舟中

正好春風吹客舟暫拋塵牘卽良遊山當盡處仍餘黛水
到迴時不斷流細草作泥憐雨後閒花如雪認牆頭笙歌
想像揚州路十里珠簾已上鉤

除夕書懷

扁舟南北笑浮家故國長安兩地賒六十頭顱虛廩祿五
年邱墓隔天涯貧原可樂身宜儉壯不如人老更嗟飲到
屠蘇聊自慰不將清節負氷衙

打牖

水急船沈暮雨寒長繩百尺力應殫耐將老眼看身事日
日鮎魚上竹竿

查園

花枝零落畫簾空亭角蛛絲半網蟲只有清蟬仍抱樹盡
情啼到夕陽紅

七月二十八夜坐

歸帆初卸棹歌停漠漠涼生草露零正好夜來無月上水
涼風細數流螢

江臯

臯字鳴九號鶴亭貴溪人雍正五年進士授吏部

主事歷任河南道御史曾往河南獻修鳳鳴獄多
所全活未及大用而卒有薌溪集

舟泊洋塘與楊子竟庭夜話併送調任之始興

買棹沿江上孤篷雨不禁一襟雲水意千里弟兄心野漲
雙溪合蠻烟百粵深遙看天柱好何日共披尋

佳會良非偶停橈話薜蘿故人久不見新政近如何綿木
家山近繁花驛路多春江潮正滿行矣慎風波

伯父宦遊十載歸時行篋中惟書數卷陶然有五柳
先生意喜而賦之

宦海能飛卽是仙攜來琴鶴興悠然十年夢醒邯鄲市千
里人歸書畫船三徑籬邊松伴菊五雲樓外月生烟

界陽署中

伯父建有
五雲樓

會稽太守如相訪不學臨岐贈一錢

何天爵

天爵字從之南城人雍正五年歲貢性高脫有山
水癖尤精音律制笛譜每遊必囊笛與俱自署小
印曰天涯行者晚慕陳希夷爲人號睡鄉選浮梁
訓導未任卒著有睡鄉集

松庵待月閣隔江吹笛

野蓬誰家百感餘塞笳邊角韻相於橫吹三弄闌山合直
與孤舟涕淚俱楊柳月明更漏永梅花風落夜窻虛客身
正自艱難日吳市吹簫學伍胥

客牕夜雨作

竹雨梧風起夜闌四更鷄度別筵殘故人桑柘烏棲穩遊
子衣裳白苧單垂死風流皆涕淚逢場歌笑倍辛酸酒杯
絃索稱清課並作天涯行路難

仲兄公遜覓子湖襄覓姪關隴臨發愀然感賦二長
句幀之兄室壁端時予亦整天涯之遊矣

垂老居然作客遊夕陽春水下扁舟一門骨肉關山遠萬
里風塵髣髴髮秋鷄鵲洲前烟漠漠鵲鵲原上思悠悠生兒
不用封侯計濁酒香粳送白頭

幾年家運倍辛酸五戌鷄豚社臘寒乍脫兵戈存幼弟飢
從衰老上征鞍庭空鼠雀門雙掩腸斷關山路七盤更有
勞人厭桑柘天涯何處罄交歡

吳邦鏞

邦鏞字先聲南城人

松湖舟中同何從之作

河堤風竹亂寒烟坐對西風共黯然名士文章知已淚長
江風雪故人船孤吟難寫傷心日華髮能禁歲暮天回首
十年成往事青燈濁酒伴愁眠

過廣度庵弔李泰伯先生墓

秋風吹雨過城西綠樹那烟望轉迷入定午鐘初出寺隔
籬疎竹忽聞雞浮雲冉冉無今古荒塚纍纍有蒺藜欲起
九原重嘆息鳳凰山下鷓鴣啼

自劭

錢塘吳錫麒填詞

先大父號翼堂世居南城雍正七年舉人少博學
習掌故同里何騅鄉張曉樓潘東山鄧來園梅慕
堂諸先生深相推轂惜棄諸孤早手澤散佚僅存
詩六首

登天柱峰絕頂

天際真人想於今可得言東西懸日月吳楚畫乾坤題壁
飛鼇矯攢岩伏席尊割然成一笑翠石落驚猿
振衣千仞處徙倚得奇觀劒指浮雲冷鴉飛落照寒附庸
稱小從鼎立逼幽巒爲念韶光逝山靈誦到難

俛視壑前雲松濤足下聞遊人能拔俗到者信超羣石竇
留丹竈金庭閱赤文茫茫天寓近仙衆有誰分

憑眺益蒼涼武岡接混茫有橋通雁齒無逕轉羊腸柯爛
開碁局僧歸裊篆香遙看撐玉筍已放白毫光

天風生兩腋吹我到峰頭洞府羣山在盱江一帶流礪泉
清可掬竹箭翠將浮自笑成詩癖長吟苦不休

歸到前峰屋低徊百感生烟凝風在樹人靜月窺楹紫笋
香纔綴清茶滑可烹此中填五嶽鬱勃未能平

嚴宗定

宗定字友黃號得村分宜人雍正七年拔貢分禮
部學科任新興場鹽大使解仕歸以詩歌自娛著
有可錄負書草

對雨書懷

連宵梅雨海天昏老屋吟詩盡掩門官拙自憐雙鬢改囊
空那得一錢存紅悽綠慘窺花柳水遠山長憶弟昆欲與
晨風謀假翼釣竿歸去白雲村

章秉銓

秉銓字衡三號淡園南城人雍正八年進士授禮
部主事著有淡園集李紱輯其詩與鄧錕雲同梓
名章鄧合刻

出東郭至薦福寺

漠漠禪院寂蕭蕭落葉深晏坐復何有磬聲動寒林慈烏
時一至水石清禪心微風發纖籟冷若魚山音曰余身世
役百念載浮沉對此一茫然千佛入我襟竦身上高閣晴

空下森森竚立默無言片雲出遙岑

鄱陽懷古

上游當日控荆襄戰鼓黃雲壓建康一敗遂成隆準帝百年空笑夥頤王秋風草色餘殘壘孤艇波聲滿夕陽唯有忠魂難泯滅靈旗風雨在康郎

次百川前輩韵贈春到園主人

逃佛西崦日鼓懸禪孤山鬼也周旋觀河面鰓飛騰日理髮心長跌宕年事去已隨秋葉脫愁來還似夏蠶眠紅牙斑管都無賴欲學成連竟刺船

鄧錡雲

錡雲字沛膏新城人雍正中諸生與南城張曉樓

潘立夫善旣乃厭棄帖括肆意聲律學著有愛秋齋詩集

北田學舍雜詩

莽莽新堤路滔滔流長川我來濯足坐綠水映菰烟旁立
一老叟指點語從前王家觀稼堂此處列層軒北園尚書
業花木儼平泉豪華少長久陵谷多變遷岸崩猶未已將
及官道邊道邊峙華表于今幾百年誰歟化鶴歸勸人學
神仙

口占送程女歸

母死諸雛在嬌癡鮮事稀眼前惟汝大辭我又將歸屬別
言難了傷心淚各揮秋風憐弱弟好爲寄寒衣

雨後望天峰馬鞍兩山

兩山排隊闢崔嵬宿雨初收翠作堆高柳長堤遮不斷一痕晴碧過江來

讀史

中原爭逐鹿楚漢不解兵蕭何薦韓信國士有真評登壇拜大將一軍皆爲驚指揮成帝業功誠莫與京勰通言不入解推有深情司晨惟家索宮中雌雉鳴設機縛走狗垂頭竟就烹詭以同貉反密語誰聞聲相國實與謀深文良可矜險矣刀筆吏難與其功名

武皇崇儒術仲舒乃流落武皇重邊功李廣乃寂寞三策陳天人正言何嘗謬善射臂如猿匈奴窺沙漠兩人豈不

飾白首嗟天護碎如好畫龍遇龍反錯愕當時問學人魏
魏居臺閣天幸偶成功封侯乃衛霍

假館楊氏曉園卽事再酬何從之前輩資溪客舍寄
答之作兼柬張百川二酉山房

挾冊江鄉傲素秋閒雲高鳥共優游居停我自依揚子寂
寞人應笑鄧侯講席晝長塵屢拂風牕夜冷紙重修清堂
未覺天池遠日溯洙源最上流

薜荔空山秋氣涼東平客到賦同裳驚看鬢髮星星短細
說心情夜夜長伴讀童烏殊捷給從遊穰駟亦踈狂追歡
一月人都散依舊寒燈對曉霜

袁守定

守定字叔論號易齋豐城人雍正八年進士官正
江知縣有政聲擢主事乞養歸主教豫章書院者
有未學詩鈔

都臨安

都舊京帝曰否都荆襄帝曰否都金陵帝曰否三十六策
無如走惟有臨安近海口海水洋洋事急可航恃此無恐
斯謀孔臧

賈平章

北師盛卽乞和北師歸奏凱歌乞和不通幣更羈北來使
北人方怒南人逆大營葛嶺作仙窟半閒堂前秋應律平
章平章且問蟋蟀

曲周襍詩

整駕臨大邑承乏及蘭時蘭時迄首夏矻矻不遑居譬彼
力田事日夜有所思所思復何許要與斯民宜斯民樸未
散遂古以相期撫摩之不服曷爲云治之簿書遠至道恥
以吏爲師下車諏所苦將以已其疵春風不澤物安用青
陽爲

稚節爲州邑白首仍傲吏匪敢薄微官咈民心所悖維民
君所天何爲草菅視俯已遂其求以此畢吾事吾道貴宜
時宜時良匪易道味爲之根嘗恐迄失墜惻惻物所依隆
想不能至歡悰生淡泊至理契勞勩治幹非所云洞然期
此意

仲夏時雨至野水滿芳塘清颼吹四鄙蒲葦散餘香我聞
良有司國脈爲靈長陰陽俯從之百卉繁以昌偶行見蕪
田怒焉心內傷自顧無善術何由致嘉臧廣廣阡陌中皆
我子弟行維民知我拙不以巧相嘗曷用慟所期獨立空
傍徨

衙鼓奏惠風晨色豁幽室清露滴階莓庭樹滋以茁歡言
就花逕意翻有所失曰余縲寸組胡乃游于逸超興道不
存懷安物已疾惠以積誠流事山精氣畢訟帖有餘甘所
樂非縲帙了焉撫念始持之在專一

侵星出縣門紅旭條已逼晨氣靜川原流塵不我卽輭風
吹雨過草木皆自飾南陌禾油油東菑稷翼翼南陌復東菑

問土風聊以稱吾職府帖每下來瞿然念民力民力信用
之余懷正默默服食民之膏君子有懼色

炎節啟修景遐穹散澄霽郊陲杳且青列樹蔚相次麥禾
翠欲流滋以解風吹細草亦懷新彼物皆有遂驅車值農
節農里喜我至我至亦何爲泣之以和易婦孺知我心牽
車敘其意父老無襍言歌詠以相媚相媚繼以泣吾亦墮
吾淚

退谷襍咏

賤子謝世紛屏居依山麓我生皆退期因以退名谷谷中
化宇寬欣欣滋百族紫芥恣朝甕綠蘿充時服抱朴轉爲
光殫和恒自足羣鳥哢載陽吾氣與之淑景風吹蘭林几

席自流馥眷言協幽襟罔知四運速念茲歷年所悠哉得
歸宿

時序逐流川退谷春已暮春暮各有營驅犢上村路徇祿
意多忤食力勤所務芒屨染芳菲卉衣生烟霧浮雲過隴
頭輟耕而有悟卽此爲形役況乃勤世故人事會有終於
何加吾素緬彼方輿中率爲居室誤

精廬闕虛與青虹橫屋角琢木接前榮木末吐丹嶽薄杜
送餘春初篁立已卓已及舒綠薇復此紆青藥撥蕊鮮猶
駐攀條嫩可握欣悟一何多襟袖生元邈離事遂幽屏而
將返吾朔

積雨喜初晴堅色爭如洗天風吹遙青嫩草當其靡布畝

既芸芸斯川亦瀾瀾陸木陰猶隙阪雲矗更絜白鷺引其
維余亦攜稚子人各顧所息彼物亦如此相與樂時熙願
茲景物美行行力稍慵坐對清冷水

長羸鼓羣植融風扇新節中谷有幽人筋力憚棲息嘯爽
及朝陽課虛至日朕依方得所資趨物亦云歇慮淡奪夏
威天地不能熱蘿戶旣整除岩櫳乃疎徹造夕浩天懷芳
樽聊一設夷猶遲所歡風期颺翹結

溽暑妨我閒溪閣覺有異閣上俯迴漪灼爍散香芰幽寓
廻蔚藍平陸鋪葱翠葭柳清復幽好風益其致良友懷古
歡清讌兩不忌不復表吾誠於何將以僞相與游元虛各
各遺塵思俛仰坤隅中與物同茂遂

南州多修柯鬱茲烟靄氣結屋倚桐陰蔭之以新翠葺窻
綴蠟蚰藥欄延薜荔冲曠外多遺岑寂內所嗜虛室意先
涼適有清颺至一葉響空階悄然得幽契已結松菊緣無
復江海思守一愧微真曷由證超詣

薜收蕭谷風舊垞見秋姿秋水澹不流直與吾心期木石
含高格靜中乃見之元林逞隘市沓嶂表崑嶸鳥歌時斷
續嵐影乍合離我顏既屢改山色故如斯寄此殊草草要
有出谷時鄉山將不去行且屬阿誰

元穹曠南服墟井散餘氛野屋秋聲中淅瀝繞屋頗中有
息機者肯然若不聞涉有翻茹淡澹無獨守真住著究何
有領畧多所欣竹壁走虛光從知日已曛竟日無人至迴

颺推我門

秋序實起余西氣靜苔閣苔閣敲且古相維以草索砌下
列時蔬門前帶長薄簾落芬若噓園亭翠欲著閣上多素
心矻矻耕與鑿理策出東垞佇觀東鄰穫鄰言穫有加維
余亦孔樂東鄰粳稻富西鄰稔菽博禽鳥恣歡聲微生此
可託

尋幽到絕壑孤嶼組寒翠解纓濯清淺拂衣踐蘧蘧造勝
啟天荒入深闕地闕延物果成賞騁情得攸遂遺衆佇層
巔驟覺此身貴出山意已移靈境渺天際從知此後身所
莅皆造次歸騎猶餘映爨烟生井隧輟策避乞人一下蒼
生泪

林臯招朔氣寒色厲毳褐卒歲人事多伊余獨曠絕靈雀
憫我閒羣集喧以聒蕭蕭板屋虛浩浩霄宇闊牕中縹帙
明窻外木葉脫此心淡於水況乃對冰雪延賞曷有窮緒
性不可奪隕然乃忘言造理激自悅

殘雪掛陰峰餘寒生草屋幽吹入庭除策策鳴窻竹已見
圓光升還覩畢景速虛谷歸夜輝羣動寂以伏柔絃散鬱
伊清醕澍帶獨寒釭烟不滅長劍光可掬蓄意事多違邁
心理已熟理到夢亦安邈然遺塵黷投老乃在茲於何煩
出卜

閒居襟詩擬陶

苑齋謝人事疏素與化移旣閒覺有得愈信前事非一室

亦何有抱樸自委蛇蓄琴常不御乃爲塵所棲但識琴中
趣何湏手自揮賓至聊命觴相對兩怡怡田居乏僮僕我
自斟酌之此日亦已竟來日復何知

東臯美見招尋芳散芒屨薄遊多所經愈知故鄉樂飛雨
暗西村我行猶日脚好風亦相隨翊余度短衍前路及平
疇主伯方力作余亦試爲之嫻習仍如昨僉曰爾誠能自
顧良不薄多謝諸老翁行當事耕獲

人言我天慵我自適我意空齋爾寂寂鳴鳥時一至野處
誠單薄賴有松竹衛凌晨披風襟忽忽起遐思我不出戶
庭有時獨攬涕飛蠅冒戶絲亟爲釋其繫嘗恐傷穉蟲行
步多審諦茲意竊不解而自哂其細

田棲招好况閭井春已殘鄰父時相過晨談有餘歡妥帖
隨鄉曲不自我造端於物旣無迂以茲長自閒庭前有襍
樹繁枝手自刪綠縲卽所愛何必及花繁春風埽石塵柴
門亦自閑此中有大妙不覺筋力孱

壯年繼世務寄跡天一涯已乃返湫宅尋化守無爲寂坐
還行行涉趣過東籬嘉卉三兩種襍植在菜畦乍觀花有
信又恐稚子知護花若保赤委曲隨所宜卽此爲事事而
可脫塵羈近履多頽放新詩亦如之

述農

鳥聲之仲月惠風以時至溝塍綠霧浮我行習其翠古之
士卽農耕讀無二致帶經鋤龍頭鋤也有道味爲學始謀

生林刺不辭，額苟祿非所。貴家食資地，利鍊骨在水雲而可幹。當世所以猷，敵中常有天下器。

陶思賢

思賢字芳齊，號省園，南城人家。貧，采薪以養。年十六，始就學。雍正八年，成進士，試用浙江知縣。改九江教授，兼主白鹿書院。著有田園集、鹿洞鐸餘錄。

席帽山

秋風蕭巖谷，秋山澹江渚。席帽何戔戔，嚴裝戒容與。石人兀然立，相看默無語。悲風動霜華，夕陽下孤嶼。安得招之來，班荆商出處。

毛女峰

一峰高峙眾峰低細綠叢生夾小溪
毛女洞邊留汨竹玉
姜天外寄孤棲千年歌舞銷金粉
百戰山河雜鼓鼙欲與
麻姑同控馭九天鸞鶴俯塵泥

甘達

達南豐人

拜機齋公墓

蒼松古柏暗佳城細掃殘碑淚欲傾
罹難未逢千日醉脫
衿喜得一身輕墳頭孤兔看來往
谷口漁樵記姓名無限
烟雲惆悵盡山山空聽子規聲

夏之翰

之翰字知畏新建人雍正十年舉人
著有檀園初

稿

義冢辭

城之陰兮沙積山哀填寡兮作墓田豈北邙兮夾松柏藁
裡掩兮愈棄捐冢纍纍兮鵲尾銜櫬疊疊兮魴鱗編桐棺
薄兮風雨蝕衽束解兮螻蟻賊齒既盡兮骼如霜羣鳥啄
兮噪夕陽道傍過兮心盡傷呼將伯兮爲瑾藏嗟世人兮
遭百罹生煢獨兮死愴悽居何方兮長何所姓氏泯兮知
爲誰死者聽兮我有言魂逍遙兮無煩寃陰陽移兮命遭
露百年逝兮誰復存號旻天兮徒悲切九閭遠兮不得聞
陳椒漿兮奠桂酒收爾骨兮共培塿大隧穴兮馬鬣墳魂
其安兮若比鄰

過憩雲菴聽心公談秀峯諸勝

秀峯老人匡山居翩然瓢笠來洪都嶙峋鶴骨自峴異清
談揮塵如貫珠開先奇秀夙所慕十年夢寐徒區區案圖
苦索不得一揣摩彷彿終模糊公乃爲我細剖示拂几聯
席重披圖一經指點條有悟峯巒縮地來湏臾仰觀瀑布
百千丈晴空隱隱轟雷車老龍蜿蜒勢拏攫涎沫噴薄驚
天吳香鑪縹渺雲氣動青烟朱火何其殊雙劍聳插霄
漢錯愕無乃冲天衢奇峯巨壑互拱峙翻疑人巧天工俱
造物設施頗有意象形直欲傾公輪蹄高俯瞰羣物眇江
湖望裏如盤盂探幽選勝殊不易淡句未足盡一隅泉傳
三疊自今古得其二者始尋蘇後人踵事搜未脩靈境恍

惚知有無我聞公語妙無匹身雖未至神已趨鐺翻蟹眼
試異茗習習兩腋清風徐期以明年秋月滿買舟直下彭
蠡緒借公一枝棲鵲鵲攀躋日月窮朝哺飛入雲天一長
嘯欲與五老相招呼

病中登舟次日舟未發適家書至喜甚枕上口占

病亟轉牀席蒲質分凋謝所悲有老親永永辭膝下弟妹
忍棄捐兒女待婚嫁生還意外事登舟自疑詫黃河漲秋
汛濁溜恣湍瀉喧豗奔魚龍洶湧流日夜練心浸太清臥
穩晝晷暇忽聞家書至靜中喜生乍奉之重球琳萬金未
爲價中有老父書教訓兼慰藉上言身康強下言早歸舍
弟書感桃李裝書惜蘭麝亮兒年十五反馬始學駕亦附

札數行文勢頗脫卸每書喃喃讀津液如啖蔗好風東北
起破浪更何訝爲我語長年揚帆下前壩送我早南歸沿
途看穠稔

邗溝行

邗溝清黃河平邗溝濁黃河酷邃古奠位四瀆分滔滔各
自趨海門懷山襄陵雖降割四瀆不聞互齧吞天有分野
地有紀南條北條異源委順其長性皆安流機巧誰開爲
禍始句吳夫差築邗城溝通江淮二水并是時黃河未南
徙舟楫便安人所爭小利之門大害伏千古留作揚州毒
自從河徙入淮流代憂潰決勞隄束河聲鼙鼓來達達還
波斜射清口紅淮水緩弱本難敵咽喉况洩邗溝東淮壑

日弱河日橫河伯蹇蹇迴涘咏只今邗溝溝水渾葦寺日
竊憂時政水流習坎熟路開海口漸壅大汎來抄淮潛江
事可懼三瀆混茫非常災我

朝至德天厚眷懷柔四海長清晏書生空抱杞人憂暴背
欲獻

天子毀遠慮終湏戒不虞同時巨公意弗殊奏章猶記李
敏達議論近見胡環隅李公已逝胡退老忠謨長存照蒼
昊區區但願邗溝清執政報國無草草

感懷

人生百年閒榮悴無定時昨暮非今朝前路非舊蹊旣過
盡陳跡未至泯端倪一身歷萬變倏若浮雲馳百年尚如

此何況萬古期宇宙無終極來者誰能知

涼風

涼風吹未已苦雨連昏朝沉陰積秋氣天地爲蕭條空庭得餘閑坐感百卉凋獨有芙蓉花眷眷慰寂寥

置盆以爲池累島堆石子池島一時成湖山已如此勝魚環其中不知幾千里問水水如何無源亦無委

江岸

岸字嘯山貴溪人雍正十年舉人與兄阜弟帶峯齊名有棣萼集

秋日行江上望邑中附近山水作五言長句以紀之
秋容不媚人佳處在清瘦竭來江上行還囑前峯秀草淨

山骨堅風細水紋縐列景紛在目衆壑遙相授巨石椎上
游古寺踞其後白浪湧青蓮毒龍未敢鬪鬼斧削天壁橋
如偃月覆矯首吊蛾眉小隱夢清晝杳靄紫雲深洞穿日
光溜五面佛髻高一綫女媧漏神筆劃空山龍化不聞吼
石竅慘潭陰危橋風雨驟奔流自西下迴溪折左右體勢
別岡巒襟帶分環扣羅列太傅碁紛拏米顛袖歷歷指顧
間一一窮巧構我行挹高秋雅與山水奏曠望日已永欲
歸還逗遛夕陽散人影浮雲已入岫

潘中立

中立字在田號松溪新城人雍正十一年進士官
內閣中書乾隆初直軍機由侍讀轉刑部郎中卒

崇正書院

孔孟去千載六經渺微茫羽翼繼刪述道脈開紫陽先知
覺聾聵斯文仰津梁致君思堯舜四海還虞唐惜哉南宋
時舉國真若狂黨綱斥偽學棲棲走皇皇挈徒此山中講
學武夷堂閩海雲影淡簫峯天日光過化留遺蹟高山懷
景行憑弔石壇路滿目生蒼涼

盛時重儒術正學崇表章鵝湖白鹿洞天書煥球瑯建武
聖學窟文獻稱西江何年復修舉萬仞瞻宮牆

饒九坡

先坡字右蘓號介岡進賢人雍正十三年拔貢著
有近詩代鈔

九日寄友

獨酌重陽酒思君客路遙還家空有泪孤棹自無聊日落
飛殘葉猿吟起夕飈登臺一騁望萬里共蕭條

苔

杖履不到處幽人一片心平生依水石多是伴蟲吟雨細
連階積秋空覆葉深柴門無客掩寂寞到而今

無題

輕颺柳線結朱櫳初日高樓燕語通鏡裏含情傳彩筆池
邊催舞倚翺風薜蘿門罷珠盈袖金鴨燒殘蕙滿叢不是
繁華嫌寂寞那能待笑倚牆東

羅帕水文煖半消碧桃花下坐吹簫乍逢蛺蝶歸閒院又

報流鶯度綺寮好夢慣從媒雉狎佳期猶愛彩鸞招春山
白隔河源路雲雨參差逐恨遙

賴建揚

建揚字銘柱龍南人雍正中貢生官樂安訓導

送別吳邁庭師

几杖相隨歲幾更曉寒江上話歸程庭飛朔雪遮前路日
破同雲放小晴童子也知師郭泰諸生惟欲乞陽城風流
祇合傳青史拜別依依抱古情

賴宴揚

宴揚字衍濟龍南人

南浦亭留別

執手臨岐意渺然風生南浦蔚藍天鬱孤臺外青山在章
貢流中贛石懸寶賦君應邀重價憐才我不學頑仙相逢
再話平生事得意終須到酒泉

尚廷楓

廷楓字嶽師新建人以父滌浙江提督廕任戶部
山西司主事

洋園晚霽出門望國西諸山嵐樹葱鬱雲景清麗天
風徐來吹人欲仙遂有是詩

素抱積孤貞元修悅靈異萬象日孔昭靜如無所事當茲
夕正佳况復雨新霽上天放明霞衆山飛廣翠美哉清虛
風而吾披拂是挾仙相與行靈島忽已至石門溪水前鳥

江西詩徵

卷七十二

國朝入

五

雀桃花內雲光滿洞幽棋聲出樓細三揖浮邱公一問丹
經字體固韜瑩神容鮮鑄鼎歲黃精食難飢甘露飲易醉
野馬馳靡寧麒麟知與未

高歌

江動金風裏天寒玉露時孤帆秋色斷斜月夜光遲對景
愛蕭瑟高歌傷別離無因北樓上長笛使人思

春日懷王羲叟

鮮雲覆高嶺望遠獨躋攀日照雪中樹人居川上山背言
具尊酒期我向柴關道里正迢遞空悲離別顏

野中

雨嶂高花溼風原灌木清野人無瓦屋春色自柴荆城遠

舟航至天開鴻雁橫晚晴溪路寂月帶一星行

宋耶中姚秀才招遊西山集龍潭晚歸獨過香山寺
呈操上人竝貽姚宋

翠嶺鬱糾錯崩厓莽削成石苔人去積山鳥客來驚日照
蛟龍細風吹鐘磬清開樽潭上坐萬木白雲平
宴罷客言醉各乘車馬還獨由春水外笑入暮雲間石白
松依寺天清月在山非移陳賞及自愛老僧閒

王華嚴招遊南池晚過望江亭待陳景庠不至

并刀誰使割吳淞王宰應期此地逢沙外雙飛仙客舄岼
西孤出丈人峯川懸明月尋舟楫天放高雲下酒鍾不用
撫琴歌伐木過江吾欲採芙蓉

郊遊憩叢桂亭酬陸嘉祉

幽草清流不遠郊
亭前翠嶂出林梢
曉風吹水客磨鏡
春日照山僧打包
何處鷗波亂
鷺鷥一絲蟲
葉下蠨蛸士衡
辭賦非招隱
神悅松漿輔桂
穀

北山暮行書所聞見

懼滑攀危振古筇
力經勞瘁轉從容
空林古廟忽聞簫
落日老僧忘打鐘
行叩柴扉留薄莫
坐來山谷類清冬
明朝須掃白雲去
盡覽北臺無數峯

送厲太鴻

層城搗練北風微
送別沙頭淚染衣
四野夕陽羣鳥散
萬山秋草一人歸
新霜已見鬢絲改
中歲徒傷心事違
湖上

舊廬終隱得嶼梅汀柳尚依依

題汪西顥花塢卜居圖卽送歸武林

高月弄明色惠風揚遠心西溪水流淺香塢春光深我友
欲歸隱結廬在峯陰因思飯僧後臥看梅花林

送趙意林

野鳥生嫌浴鳳池國門攜手不勝悲故山松竹情元厚
聖代文章道豈衰塞上風高雙雁急江南天闊一帆遲重
經淨慧論詩地七寶莊嚴問是誰

秋日送雨豐還越

青山一線穆陵西秋送王郎返會稽烟沼收荷飛鼠下風
林繁栗野猿啼相憐踪跡同羸馬轉誤文詞是碧鷄三十

六峯天子鄣掉頭真擬赴高樓

送沈確士南還

清砧繁漏草蟲悲相與鐙前話別離堪歎困車多鶴脰頓
憐求鼓失鱗皮人生正合安今日世事何當異昔時君住
平江江水上雪蓑雲艇渺難知

送循初還嘉興

燈前離緒不能持坐到天明酒莫辭三徑綠苔人別處一
江紅樹日高時還山書劍行隨客高世文章賞對誰此後
相思人易老歌成已變數莖絲

送王載揚還吳江

行跡淒涼酒後顏離亭孤月異鄉山客情解惜明朝別一

夜雨寒幾叩闌

素壁清燈張古琴
洞庭木脫水深深
江鴻夜叫嶺猿急
月白天高風入林

湖莊芳草白敷腴
桃柳春天無處無
高坐暖風遲日裏
鄉子燕塞憶鶯湖

茶洋上副憲孫公

漢帝立石渠
唐宗開麗正
制作得鴻通
典章顯明聖
後代忽稽古
巖扉斷車乘
羣攻帖誦業
莫析邱墳蘊

聖君崇實學
旁求切才俊
弓旌九宇周
異數千秋盛
誰司推轂責
公忠仰當柄
匠石需豫章
樂師審球磬
清濁愼厥分
良楮從所鏡
肯令側席心
祇其彈冠慶

粵子負不羈少小遊藝林沈酣忘歲月十載同書蟬通籍
從任子內顧違宿心簿領非所習郎署聊浮沈大賢邀顧
盼拂拭還硤鍼遭逢右文代竊慕卷阿音詎意青雲士器
我逾南金姓名列薦牘良覲猶侵尋相賞未相識此風
古今作歌頌知己海岱同高深

李天爵

天爵字君一贛縣人雍正間舉人

送吳正汀山長

自謝燕塵襪被東歸來一畝舊時宮蛾眉每覺羞新月
足猶驚踏曉風芳草妻其秋水外美人遲暮落花中陰
疇定有揣摩訣焚上秦書再發蒙

李發萬

發萬字步丹會昌人雍正間舉人

半山寺

半山山半寺曲磴遶林邱竹色粘天碧松聲出谷秋僧迎
舊雨客鐘送夕陽樓未許逃禪久黃昏過渡頭

喻指

指字非指一字卜其南昌人雍正間歲貢好遊航
著述年八十作自奠文時比之淵明著有西山志
攻異叢言後村隨筆

報國寺松

最愛慈仁寺雙松不負名日中來雨氣天上落江聲天矯

龍鱗長盤迴石髮生萬山皆剪伐羨爾獨無驚

登岱

五嶽一生志三春兩日閒帝鄉應有路人世更無山領欲
採金策何能駐玉顏待期婚嫁畢投老白雲間

白門偶呈林茂之徵君

澤國烽烟逐散貂秣陵人事更蕭條山頭牧馬無春草城
下東風有暮潮白髮逢君疑再世清尊爲我說前朝天涯
便欲相依隱何處能容釣與樵

題畫燕

王謝風流事已非天涯誰識舊烏衣年年結伴空歸去多
少朱門不忍飛

胡道問

道問字近思會昌人雍正中諸生

村社

立春五戊是春社春氣融融風灑灑老幼歡呼集郊野土
龕數尺半覆瓦點燭焚錢香一把肥雞瘦肉紅魚鮓侑神
祝神神錫嘏年年畊牛如戰馬

賴鯤升

鯤升字滄嶠會昌人著有霞綺園集

次韻留別一士湘臯非爵

覬逐征塵浪啟關迢迢一水載秋還纔逢管子須焚硯豈
待于公始買山恍影不離疎柳外夢魂都在落楓間遙知

諸子佳音近江上飛觴一破顏

劉世基

世基字松嶽會昌人

宿半山寺

渡口斜陽岼逶迤過半山林深知寺近門靜覺僧閑香火
諸天供塵氛五夜剛樓牕驚破曉明月印松關

陳鵬舉

鵬舉字謙益南豐人

東林晝倦睡中得夢隨黃蝶澗邊飛句醒足成之
居閒分與世相違日日吟詩坐翠微心共白雲天外遠夢
隨黃蝶澗邊飛崎嶇世路惟高枕落葉柴門靜掩扉種得

青松老歲月一竿長臥釣魚磯

戴玠

玠字衛兒萬安人

萬丈石

晨起理輕舟數里見蒼碧紆折溯溪流突兀搖心魄寒陰
凝深峽風色撼巾幘此身非羽毛安能量尋尺虧天半角
青與雲一縷白樹根無寸土亭亭懸罅隙蝨垤視諸峯紛
紜在砂磧累日看不厭俄頃多所惜險澀得通行放眼收
奇僻

蕭永泰

永泰字璜質會昌人

雨後過護生庵

僧舍參差出高松遠近闌踈離穿木槿短屋架薔薇客去
留鶯坐人行礙蝶飛偶來方外地心事便幽微

蔣堅

堅字非麟號適園鉛山人幼以智俠自喜迦名法
遊江湖間爲當世所重

小園梅放偶興

離離照殘雪脉脉壓溪濱一任夜無月何妨天不春芳華
憑俗賞風味與誰親祇覺閉門後徘徊自有人

過故淮宮

鷄犬何曾到上頭淒涼也似小山秋宮門畫掩人鈿華雪

洞昏黃客飯牛一種寶釵埋恨骨百年華屋變荒邱神仙
富貴原難並莫與劉安較去留

謝山

山字遠宜瑞金人少不事舉業放懷山水遊屐遍
天下晚歸築室山中年九十餘卒著有灌木園集
自城市移居謝屋排舊居時乾隆甲子短至日也

去家三十載終得返山居行李無餘物空囊有破書雜花
滿籬落野水入堦除鄰曲時相過敦龐類古初

江西詩徵卷七十二

江西詩徵卷七十三

南城曾煥賓谷編輯

國朝

楊大業

大業字藏用四川人漢赤泉侯楊喜之後雅州土
官天全宣慰使自唐子以征西壙功襲職雍正間
因事徙置南昌遨遊山水間自號花洲漁隱著有
寶善樓集章江吟

海棠花用王漁洋移竹韻

美人爲解顏憐此紅暎肉秋雨下牆陰裊裊占銀竹豔質
豈殊衆蕭然自絕俗賴爾如幽居時用寄愁日芳蘭非不

美道蹟每空谷讀罷風露寒夜深猶把燭

贈雲池康道人

玉壘有浮雲變幻難忖度傲岸負平生翻成折腰諾洪都
掛帆來顏熱逢人作途窮不可哭傾囊罄金錯山居一行
散能忘數日惡花木每流覽笑言時聞作尙當從韓眾往
采閭河藥

哭亡姪壑

蓬飄別鄉關全家逐輕舸往往風波間推蓬出呼我比至
南昌城奔走少閑坐乞得蕪公堂觸目暗塵鎖相將爲葺
治弟右我則左貧極病爾侵服藥至百裏虛焉不復生堂
上喪車臥

去春哭我父今夏哭我姪我生亦有涯百感茫茫出有涯
雖趨庭方識六與七側身患難中緩急有誰恤支持實難
爾慰我天命卒顛倒遽如此憂虞何時畢

贈百花洲僧

卓錫當名勝談經正妙年直將塵世界都作古林泉湖水
澄心地曇花種佛田座中休豎指相對意悠然

楊振業

振業字鐸仲四川人徙家南昌大業弟著有圃寄
草

底績靈

紀揚靈也大夫卒於南州異日和川人來言靈數見於署新收祭告請附城隍款祀始懸

虹旄一夜飛底績還凭壽邊樓几立四野淒颼白晝號瀟

水戰魂齊集新官朝見鬚眉怒飭獻脂牲歆舊主僚忽
寤寐昂藏來瑒然劒佩迴風雨薦忠純孝五十秋忍共嬌
奴萬里愁浩氣還攜湖海入終看義魄壯雄州

官山淚

誌芳傳也內人同隱石莊盛年疾阻即瘞二
里內官山之塢不遠南遷二子莫返孤塚荒

荒弗

祀矣

珠璫玉帔逢碧渚鹿車偕往闢巖戶十年婀娜展修蛾育
得疑岐麟之圃慈烏夜叫麟圃側修蛾趨侍太姜泣先太
君只官山有塢萃龍鸞鴛枕含悲瘞瑤瑟紀侯大去永不
還千青萬綠啼猩猩可憐獨唳官山鶴嗚咽雙雛草澤間

送劉元信赴粵省覲

尊人錫佩
令西寧

展穴雛蛟憑江怒王勃去粵霞褰路主曠維噫起中宵一

獵獵南浦渡男兒磊砢憤名途將臨浩淼騎天吳馮夸
鼙鼓夾蘭楫直走萬里如庭除露楓霜莢光的爍濡毫浣
盡秋山碧掉鞅天門會有時且過羅浮看日出

寒食日瓜州道中誦杜句志痛

萬里逼清明空餘老淚零孤墳悲去國春樹暗離亭草斷
天涯碧山橫夢裏青更誰挈壺榼歸采野芳馨

除夕

窮年除夕難爲夕遷客驚春却望春兩地風光新舊夢六
街燈火古今塵尊開家釀碧重玉梅憶故園香滿茵最是
團團餘血淚祠龕下拜一傷神

寓龕奠獻
三世遷主

月夜憶兄

一生明月幾高歌搔首清明喚奈何兄住山南弟山北清
光落處定誰多

盛謨

謨字斗挹號于楚一號字雲武寧人際斯子乾隆
初歲貢官安義訓導與弟鏡樂並以詩文名人稱
三盛先生著有字雲集

秋齋讀山谷詩

吾寧堪異產山谷最奇偉胸月羅衆星光怪散青史詩窮
索一字味過情無已但得知者足何用世人喜雙井去我
家草木識百里詩穴久蘇燕誰與論惡美窮愁著書多過
費千萬紙人匪文章壽行藏有定履秋空溪外月洗我心

如水讀倦遊山好去摘石上耳

清明與五弟水賓門人楊子載滕王閣上取別

多謝石尤意徘徊故國深滿樓山水氣遠近自晴陰鬱鬱
雙村樹悠悠萬里心哀笳吹不盡總是白頭吟

盛 鏡

鏡字止水一字于明武寧人著有止水集

詠懷詩

孤禽何處來息我庭前樹
寥唳三五聲淒切千萬慮
天高霜露交野濶寒風度
四望無豐林徘徊哭窮路

雜詩

久從避世居弱妻漸疎懶朝食日方中重炊已成晚白日

江西詩徵

卷七十三 國朝九

四

滿空廬蕭然人事罕緬懷陶先生懷貞自元遠

山中

誰謂山中寂開懷境自親萬族各有性會心得其真虛途
憇遐想遇故理復新始知幽趣士不暇入囂塵

哭盧霖

山居懷離索杯酒恒不歡忽聞君訃至痛惻傷心肝念君
去我時零露葉溥溥君悲我亦悲躊躇復躊躇但傷別情
苦寧知竟不還我形滯一隅日月空往還荏苒三春謝未
獲覲爾顏君其倘有知期我夢寐端

平生寡交遊深居若空谷自君入我門未忍懷幽獨秋聲
動高原春雨洗農屋好風與俱來山牕恣誦讀六載同寢

興一朝委空木厭厭三十年無兒爲君哭存歿固有期傷
悲苦太促俯仰摧人懷悲涼泪盈目

盛樂

樂字水賓號劔山武寧人七歲能詩十一通經史
乾隆元年以貢生應博學鴻詞試不第歸慨然以
著述自任楊屋汪軻皆師之著有劔山集

春思

好風從東至暖氣運微軀已覺敝裘重散帶出庭隅庭隅
有老柏瘁葉今又舒潛陽鼓萬物豈爲桃李娛衰榮馮所
受生理良非虛寄言蘭與艾各自抱區區

寓言

大路雖多岐羊亡各有之五色孰爲正何用泣素絲得鹿
埋墜下豈意鄰人欺紛紛爭得失今古類如斯升仁而降
義蒙吏乃狂癡孔老誠皇皇杞人亦深思大氣有迴合異
道將同歸敢問三皇前持論誰是非

天地千年來元氣未應蟄偶然生死之毋勞費忻悒取足
杯盤間珍錯羅百十賣兒以飴餽子奪使嬉泣由來天地
心斯人遂汲汲玉燭旣煌煌螢光亦習習金棺將柳棺高
無就原隰

登繩金寺壇

新秋好天氣挾策從所務廓落層臺上開懷得遠趣山河
勢屢遷草木隱塵霧微雲足下流秋風颯然度遙望蒼雲

閭森森三珠樹青鳥遊帝鄉杳謁空中住天風四山來吾
將御之去

馬山小瀑布

白泉奔一崖崖高激其怒清見雲霧流隱聞雷雨度風來
滿空谷颼颼感日暮日暮山色深惆悵失歸路

黃嬭洞

懸崖啟兩壁突兀詎能平一水天際來驟若飛鴻驚無心
相感激聲響自然清層層石潭雨幽幽山鬼鳴日月不到
處時有春草生高樹結繁花枝條傍窅冥不剪亦不落萬
歲長華榮仙娥旣已邈几榻生微塵孤雲出洞口蕭然遺
我情

寒齋

陰風衍平原黑氣耿堂奧孤陽既無依元冥獨深造齋中
被褐人面目窮神要墟煙平不流炭影凝殘燿一簡循蜚
書靈光鬱四照有時感憤生廢書但微笑千載無相知飢
寒非所悼

山中晴

東山日未升西山光杲杲家住兩高峰得日最爲早四時
無鷄聲我園亦已曉山深春夏寒層陰隔鳥道藉此朝陽
功年年發枯槁

山中雨

晨雨留山外夜雨宿山裏六月三日夜山雨猶未已樹杪

接泉聲平時納溪水是處山澤沐靈氣所棲止潛龍翳空
潭雨不到城市

山中霧

山頭雨未霽散作千峰霧霧雨下山來沉沉失朝暮十日
住山中不識山下路鄰曲到我門歡喜異平素鑪火有餘
薪山中可常住

秋思

浮雲薄遠天風斂有餘彩微涼下碧林柯葉盡凋改豈無
桃李花良時不相待閉門檢殘書往復成千載渺然節候
深詎待越江海

芳草有遠思弱柳善懷人頗爲多情誤豔力盡三春微波

泛夕靄此意恐難陳江梅與山桂各言保苦辛惆悵歲華
暮念我平生親

留雪草堂

久托城南居塵高日景短草堂傍青冥新苔一階滿蕭蕭
石壁陰希光下清淺零露在花枝灑灑盡不散露沉花始
稀坐看歲華晚江海有長風崐崘阻層巘歎惜遊仙人
羈沒不知返

山中

白雲山之上青雲山之下雲山時一開遙見幾顏舍綠草
蒼際生飛泉厠中瀉

劍門峽

巨塊中開徑東西立崢嶸峯寄劒門峽石濤勢相傾誰謂
天地寬茲途亦不平循循出幽阻忽若登層城臨風一呼
嘯豁達來衆靈山河具纖末帶礪非虛名君看野燒處耿
耿飛秋螢東偏有石室蘿薦緘丹經披藤取之讀可以得
長生

喜汪勣入山

當由不得意劒馬落窮鄉古調驚秋葉悲絃對夕陽莫言
山酒薄中有鬱金香深谷丹砂在明年是汝糧

晚渡

短楫喧南渡孤亭已半陰落霞從水遠暮氣與秋深野岸
生新月衰林會衆音長瀾終不返流恨到而今

舟過梁口

舊是西安鎮山河亦壯哉人煙平野合喬木夕陽開地勢
移帆影天花落酒杯我行原汗漫鷗鷺莫驚猜

九日次商林

解鞍當日落何處更登臨薄酒存秋意悲笳動客心茱香
風外變霜色柳中深海月空相對誰爲清夜吟

壬戌秋夜與李庶常屯庵話舊

萬里逢今夕天涯兩故人燈前一尊酒愁裏百年身客久
身先老家遙夢不真艱難吾與汝無語各含辛

泊金塘

寒雲流不定勢與暮江平落葉有餘響飛鴻無壯聲故山

連夜雨秋水一時生
淼淼金塘濶何從問去程

送朱孺翀歸吉州

主人正乞米有客復單衣
雨雪連江至艱難送汝歸孤鶴
遲舊侶漁火下寒磯相看不能別壯心今已違

苦寒行

新雪舊雪凍不開東風北風動地來
麻姑沽酒凌高臺炎洲三島雪皚皚
神蛟僵直松鱗裂曲房貂帳冷於鐵
可憐出塞入塞寒瀚海撻冰馬蹄缺
羊毛幾尺不掩腓戰士頭白終無歸

估客行

前年行估到襄陽大堤女兒笑語香
去年行估到錢塘樓

船面面發紅粧十載江湖人未歸昔時歌舞已全非菖蒲
花謝潮無信處處波光流不定

豔歌行

長安三月柳花飛編絲蹙錦啟朱扉座上共邀枚乘飲階
前爭舞宮嬈衣舞闌歌亂徘徊久玉缸倒盡青田酒佳人
十六嬌如花葡萄酒潑臉邊霞倚欄拈花不肯出小使頻
催蜂蝶急捲簾約畧拜嘉賓滿堂罷酒寂無聲歛眉束身
背客坐寶髻影影綠雲墮主人命唱憶秦娥眼前親見秦
娥歌歌罷銀燈檠燭滅星河耿耿度明月

秋風詞

露華冷壓天門白老樹羈蟬泣風色海口潮平鷺可航銀

河不流水聲澀靈山竹實墜黃沙古鳳將雛啄桂花桂枝
低亞桂花苦世人玩此空咨嗟昨夜露破桑條直知是秦
女簫吹激餉我丹砂一百丸爲君飛上瓊樓端

隱濤閣

松條不厭寒松子不厭飢君看閣中人日夜松風吹

黃樓歌

太白下世三百年詩酒中久無神仙坡公臨流一歎息隔
歲於今又六百洪河日向東南流呂梁濁浪排高秋文字
不隨天險盡笛聲吹斷餘空樓樓上無人碑碣在子由健
筆足千載帝王手澤滿山川鼠嚙狐吹石華改鳴呼不朽
惟真文古來作者能幾人我歌此歌聲入雲蒼蠅之翅徒

紛紛

歲暮懷人詩 有序

昔在無始以前儵與忽既謀報渾沌氏之德於是
疏血爲川挂脈成嶽隆隆湛湛九有是錯爲天厭
毛爲喬厥髮五府餘蒸騰而雨雪蛟獅蜉蝣虬豎
所出其間蝨蟻化象曰人大者侯伯小者齊民儵
忽莽之蠱以聰明俾有顏舌能色能聲頑惠愚聖
以方以羣各變其醜或寇或婚德力紛紜靡竟靡
域萬億千年至于壬戌星有仁芒雲有愷色庶動
浮浮離跂轉翼於是劒山先生廣詹勞訊前覆忘
收欲發醢醢畏云井臨望洋而歎薄遊人滄于水

涉江于山越岱麋麋之性習于豐蔓道以驄驥有
動必鬪鷹則弟鶴豹則兄虎彼強而諧何憚弗侮
不干不謁從人仰俯萬里歸來面色如土蠲我塵
榻息我痺股兄賚菽釀婦羞荀脯曰遂初服搏缶
拊鼓歛然而覺其翼栩栩天將改歲勞此風雨遙
夜難晨念我儔侶幾人蒿華幾人圭組東西朔南
吳越燕楚行厭波濤居厭寒餒其垂翅落魄如盛
生者蓋離離然十人而五陟崇陵以延眺我所思
兮在何所硯礪乎嶽岑放洋乎浦澈雲旣資其偉
雄風又濟之以怒於是劒山先生有頽其容怛然
弗懌仰空長喟曰此則儵忽二帝之罪也夫其豁

而海湖劇而衡華齊制四氣舉春廢夏十日代曜
晝則不夜雲以爲房風以爲馬不作棟宇無有船
車則我與君相望不出由旬之間瀾汭之涯耳豈
復生于役之事別離之嗟今者勞以朋從苦以室
家程以巾舄阻以山河棧以霆電惑以霓霞動而
不已能無譁哉於是錯垠綜險上稽下簪據吾愁
煩被以文質安危利病有離有卽廣徵約取芟其
華說隱費相乘辭寡情竭求順已志匪同作述似
諷似頌毋傷廉德響不欲諧貌不欲澤務使其人
情志魂識與我相接庶幾遠望可以當歸悲歌可
以當泣者矣乾隆壬戌十二月二十四日武寧盛

樂水賓書

吳鏡秋

名雲炯號葛巾老人江南歙縣人

君平不欺志道在身可隱舉帷向市人煙霞上衣領不聞

闕聞聲但見巖花影

葉秋林

名丹號梅花村農江南歙縣人

銅柯盤十丈結根在遙岑下有太古雲相隨獨至今行者

空喟歎寧知多苦心

張旦尾

名元春號綠溪湖北興國州人圖寫古人能得其意象不徒具衣冠而已

平生有微恨不見黃叔度頗欲慰茲懷憑君理紈素廣漢

靜無瀾高空下寒露

龔松丈

名忠正江西南昌人

小儒百不能擊繡以求偶抵間掠微榮棄之若芻狗誰憐
張仲蔚清聲落人後

吳星濤

名煊號蓮盞主人鏡秋之弟江南歙縣人今居南昌

天上多憂患公莫學神仙古來誰得意豈獨李青蓮我亦
釣鰲者垂綸三十年

李先民

名素號樸隱江西樂平人

雲與匡廬別隨風落湖水湖水去不歸相望何時已寄語
山中雲珍重宿山裏

黃一峯

名天策號香山江西信豐人

結屋香山下奇峯九十九中有一峯高聳與華衡醜鶻鶴
度遙音時時落虛雁

李屯庵

名應熙號鍊甕湖北興國州人

菊花向我言明日秋風去時節不苟延晚榮亦頗頓

借獨韻

有青松枝閱盡空山雨

毛書雲

名鴻遠號閭齋江西新昌人

毛嬙好處子亦住若耶溪臨溪漚白苧水澀聲淒淒不學

鍾離意強顏東說齊

新昌鹽溪亦名若耶溪

鄭克柔

名燮號板橋江南興化人

維揚舊板橋尙照吹簫月月光亦不缺簫聲亦不歇此時

鄭廣文秋懷正淒絕

陳越三

名超號晴湖江西高安人能以淡墨狀花卉入妙也

谷風粲然至桃李欲有言爲君發新安因風墮高軒知君

感搖落慘澹招春魂

閔蓮峰

名華號玉井
江南江都人

何遜與梅花不知何因緣
一上凌風臺能使百慮捐
梅花語何遜各自全其天

饒右蘇

名允坡號介岡
江西進賢人

洛陽古才子三十作王傅
微辭弔秋水閨闈傷遲暮
君看平津侯終當轉高步

余非睡

名騰蛟號瞢庵
江西武寧人

永叔初爲文北而于師魯
淺深各有涯後先或相取
九婉淒且荒十年愧風雨

魏功夏

名允迪號懋堂
江西廣昌人

番刀改和璞刻作夷門雲椎牛爨古鼎持壽信陵君上邪
甲與乙要結徒紛紛

熊墨園

名翰號槐村
江西武寧人

康齋昔講學卻聘表華碣盛名不可居何況求聞達遐哉
杜五郎課兒就春垓

甘周書

名禾號愛廬
江西奉新人

落霞橫秘閣天漢正西流美人低翠裏凝慮如有求遲迴
申苦調趨豔荅高秋

李若林

名芬號桐村
江西武寧人

玉川洛城裏破屋翳長蒿君今不得意心跡何勞勞幾時
決春漲一蕩市門囂

洪周木

名世楷號木堂
江西新建人

晉人泛虛匏逸少經世務臨池亦偶然所憂在國步惜哉
右將軍勲名託毫素

熊浣青

名爲霖號鶴嶠
江西新建人

雄劔出蛟胎寒芒動古壁一騁沙場中千軍盡碎易回憶
棄捐時土花無人拭

陳凌虛

名際會號湖亭
江西崇仁人

龍川景前列炙硯錄英豪壯夫多苦志簡簡聲何高露華
深夜冷倚柱摩歐刀

同甫有英豪錄

楊念中

名方立號自存
江西瑞金人

海燕還家時道與賓鴻語行邁各有由寸心自相許但願

雪霜稀留君好毛羽

江于九

名恂號蔗畦賓谷之弟江南儀徵人

昔夢浮大江同舟者誰子佳人杜牧之簫吹中夜起月上

小孤山至今感人耳

予昔有是夢今年見于九絕類牧之也

李梅情

名作相號醒園江西新淦人

慘慘女貞花冷香不堪裏不愛春風妍長有好枝葉深谷

少行人光影自相接

張行之

名星景江西奉新人

輕塵諦虛元我冠譚性命于世苟無濟何論宋與晉獨有

象山翁不負荆門令

行之今年主講鵞湖且將有牧民之責

龔鳴玉

名元玠江西南昌人

朔吹憚羣動天意在微陽君子憂細故衆人毀大防衡門
獨坐者局曲意何傷

趙山南

名由儀號漸堂
江西南豐人

長離下九天萬物駭相告不知是何祥但言文采妙竹花
易飄零高林激清嘯

汪輦雲

名輞一字迂行
江西武寧人

我愁一萬斛輞得八千斗上帝權衡之授受原不苟歲暮
勞羈魂沙風向人吼

楊子載

名屋一字梓在
江西南昌人

蓼蟲如志士習苦不言難敢問華屋中幾人勝憂患行邁
何蹢躅白日照枯顏

蔣心餘

名士銓號若生黃笈之姪頃楊屋寄子書笏山房詩喜而賦此子實未見心餘也

蒲牛咽危響海水羣相飛驚波自根觸沃日日生暉煩君起譚廢莫憚知音希

盛樵

樵字雲子武寧人鏡子幼慧工詩未冠而夭

南郊外與熊冰冶望節婦潭

楊柳年年綠澆墳願未酬可憐孤鴈影猶渡一潭秋落日在江樹飛煙散客舟驚鳥啼不定悽斷古城頭

春夜感懷

脉脉寒燈影依依明復晦照我空山心默與天地會握管夜經營微言探幽邃思窮影響間鬼神居其地元門日以

深風霆難驟至衆妙體虛無彷彿存心制

戈溥

溥字博山號焚魚子南昌人乾隆元年由諸生薦舉應博學鴻詞試不第著有焚魚詩鈔

荅饒海亭寄懷原韻

東風吹綠上新枝正是腸迴九轉時幾日春愁剛被酒一番花信又催詩因緣未了千重障世事難消半局碁莫向層臺苦回首山川迢遞不堪思

一曲聽泉百慮清只求琴意不求聲三更露墮哀猿嘯萬壑風傳老鶴鳴乍解徵商心已靜了然夢幻體都輕知君仍向東湖水目數流光縷縷情

上臆站河寄盛暮潭

進舟黃陵廟灘勢又一變亂石一千堆迴波八百漩石亂
激波迴奔瀉速飛電疊漩漚成潭吞舟輕掣線卽有老篙
師對之心膽戰出險無他術但憑雙槳健一槳不得力便
入蛟龍殿已教虎頭惡何當鹿角見虎頭鹿角二灘名到得使君
灘相對懷鄉縣傷嗟遠遊子軀命一何賤寧從螻蟻親母
俾魚鼈羨題詩寄暮潭回時一相唁轉告寶嵐君滌彼銅
雀硯待寫蜀江圖風濤飛片片

寄盛于明

山中有高士偃仰坐幽閤令我懷伊人兩歲勞寤寐昨聞
二月初定整遊春騎悵望大河干巾車乃不至我欲僦舟

來促膝聆妙義六經晰微茫一史商隆替世務多參差茲
懷乃不遂寄語山中人毋勞漫擁篲待我北征還同君面
蒼翠多買東川茶起汝北牕睡

述懷次李馨五原韻

平生詩酒癖此外更無餘門冷堪羅雀江寬好種魚
誰買賦洗俗故研書未知垂老日何以永芳譽

題盛立夫坐月小照

秋高夜氣清皓月一輪滿幽人倚雲根桐葉墮山館

東夏慎修

日月真跳丸去我亦何速憶昔聚京華連鑣共追逐對月
便啣杯惜花多秉燭一朝敕書下獨軾青門轍從此遂分

攜悵懷江樹綠忽焉雙鯉魚千里郵尺幅是君清遠書告
我煩案牘鎮日坐官曹簿書差碌碌不如客燕臺開懷中
醺醪此語十八年述之如在目君今脫塵網散髮嬉林樾
日昨折柬招高筵窮水陸偏予困升斗出入傷拘束終當
舍鷄肋買鄰爲比屋寧肯對科頭輸君遂初服

題金笠亭柳漁圖

盡日槎頭坐垂綸未一起君言不爲魚愛此川上水

聽李石磯彈琴

泠泠流泉入澗深蕭蕭松籟作龍吟稽生久住空山裏彈
出鴻濛太古心

荅饒右蘇

蜉蝣日月互東西齊物徒勞著馬蹄未解真詮休說法但
逢好景且留題世人幻夢同蕉鹿吾輩功修愧木雞春盡
出門愁悵望三山一水並悽迷

冬日

短簷喧凍雀暖日映窗虛白髮羞新鏡青山憶舊書風高
寒雁急地遠故人疎歲歲梅花發何時適我初

送張冠芳歸里

送君鄂城下東風蕩綠波臨流照顏色愁蹙意如何
正是芳菲節花明草漸齊知君先有淚不待杜鵑啼

李 灝

灝字柱文南豐人乾隆元年山歲貢薦舉博學鴻

詞任永寧訓導著石門蒞堂集

在田秋思

鐵馬銅鞍過上京
旌旗遙指白登城
風高瀚海三秋戍
雨洗陰山五夜營
戰士行間吹玉笛
將軍馬上撥銀箏
懸思
奏凱歸朝日
應作王侯老步兵

入華子岡

崇岡逼天闕
迤邐入寒山
涼飈四面來
飄薄噴紅泉
吾行
仗輕策
褰糧擬昔賢
伐木追險道
聳身陟高阡
幽人何時
來彷彿生紫煙
側聞華子期
長嘯驚飛仙
玉棺琢千載
金錄太上傳
遠眺天柱峰
孤光隱目前
麻源望三谷
清冷何
潺湲
響折謝公屐
高下聲趵然

黃天策

天策字一峯信豐人乾隆元年由諸生薦舉博學
鴻詞尋以拔貢官教諭

弔呂汲公墓

山鬼然疑路險難當年懷古淚闌珊故封蟻鼠神悽慘遺
匣蛟龍事渺漫宰樹雲沉荒堞暗豐碑雨鎖墓門寒江天
野寺蕭蕭晚懷古蒼茫倚碧巒

照鏡石

二氣毓圓核剗劈倚山澣鴻濛渾未開顏色自太古圓旋
鏡度規弧張儼承附園巧出天甄鑿痕泯鬼斧鵲飛無半
存龍蟠欲雙挂芙蓉曾著名菱葉別傳譜意是古壽光七

寶會成聚龍護擅治工軒轅將鑄鼓丹永挹飛精火齊煉
元乳景曜奪天鏡圖靈法乾宇茫茫閱太虛無言耀榛莽
造化流不息軸若手翻縷山中無甲乙長歷紀蘅杜神物
有替運驟至迫莽鹵乘化苦難爭力盡空自努光燄蝕風
雲皓魄沈煙雨抱此千劫春一朝失藻黼水妃暗胎息金
質變厥祖甕匣十三重海陵成破甑清輝還空虛紫珍疑
見取負局無人來荒岸爲磨撫靈藥宛飛去仙翁久化羽
森森百尺僵玉盃著泥土繡花帶塵腥返魂失珙珎金錯
無餘妍銀華掩舊嫿承食故未便覆卮弗爲瞽難邀海鳥
鳴不照山鷄舞我聞蜀妃坐立石表封樹傷心葬玉顏來
遊感杜甫又聞月林國百里見六腑飛仙留妙蹟鑒影妙

能補茲山胡爲哉塵窟闇蠡午迢迢野水餘我來鳴緩艣
峰靜霧初收山空月微吐攜屐斯往還行蹤雜樵豎浩浩
四天青元氣散無主蒼樸質獨完頑醜殊媚斌余心古井
水湛湛涵昭眸相對寫胸懷空谷容仰俛屢照良已疲重
遊未爲苦寄語向山靈葆真安樸魯

趙寧靜

寧靜字方白南豐人乾隆元年由布衣薦舉博學鴻詞後宗室德公奏於朝攜入閩浙總督幕

送錢唐吳子廉北上

道林玉籍之散仙身齋丹鼎心芝田韓祖蘇孫富穰穰周
情孔思過便便不用摔琴價已重未經抵鵲神乃全諸生

祭酒十數載四科行應兼才賢傾囊倒捆萬千卷諧以金石安以絃子政青藜闕恍忽康成書帶紛葩妍漢庭文采豈外獎曲江座上殊中權眉山山西嶺廬西澗元祐嘉祐寧齊肩我來蓮府相竊附更與玉季重周旋君今再賦上林苑詩籤欲續良無緣枋榆未決我自笑天風六月看鵬騫

鄧 裴

裴字又楷號東湖新城人幼不習舉子業以古狂狷自期淹通天文地理方技諸書乾隆初以博學鴻詞薦力辭不就晚講濂洛之學卒後學者私謚貞憲先生

肝城晤周緘安廣文極論聲韻之學以三詩見贈賦

此寄答并呈同學諸子

風雅列六經事非可小視一字關千秋推敲良不易古人
太瘦生乃以苦吟致鐫鑱造化愁搜括腸胃沸經生寡學
識顧乃肆輕議鹵莽縱操觚出語等吟嘯蕪辭與蔓音對
之目爲翳覆醬尙不堪災梨亦何爲夫子文江英早耽四
聲藝師承有系屬討論得其秘繳安昔任京師與曾止山先生相遇得其指授故持

論不同

清齋吟苜蓿一官此聊寄落落海鶴姿森森沉龍

氣開春一相見繾綣如夙契古音奏韶護鏗然接雅製走
也山林人少爲世所棄學射哂越愚追駟笑鰲跛竊聞先
賢言齟齬有精義學不窮五車識不周萬類如賈乏貲儲
質何以致異兩漢朔源流六朝辨涇渭三唐實大海百川

此交萃挾山而竭澤漁獵必無遺下及宋元明支流亦窮
旣派別分古今體裁鏡真偽琢句如琢玉瑕疵必剗治用
字如用賢屠沽不得廁味欲如啖蔗音欲如憂璫興寄欲
遙深情詞欲溫麗格欲如寒梅鐵榦橫古勢態欲如春山
層巒聳遙翠伏駝笑癡重簪花薄賦媚清真本性靈春容
占德器當其構思時萬緣皆撥置神凝滓穢消思精鬼神
畏初如出岫雲一縷乍搖曳俄頃雷電生瀾漫塞天地萬
象聽指揮百靈貢精銳奇聲裂太華異藻發海市藩籬盡
變化清淨快凌厲興至筆隨之古人焉足避吾江昔盛時
作者代相繼祖派衍分寧支嗣半名世邇來缺講究此道
遂陵替好手如晨星寥寥可數計

國朝六十年風雅大昌巖詩壇彙會盟國各有樹幟我邦
獨叢爾附庸陋曹鄴力微不自量思挽頽波逝四十猶無
成徒深望洋喟長言布所聞敢用勵同志

題王文成公書爲黃素堂給諫壽

有明一代多英賢國初首數劉青田三楊繼武作輔弼百
年治績稱仁宣陽明崛起自中葉巍巍事跡垂青編良知
得自萬死窟崎嶇絕徼羣苗蠻叶千秋大任有所寄龍場
一滴寧非天牙鬚勇拔虎豹吻霧雨淨掃鯨鯢淵體明卽
可以達用旌麾所向無高堅入宮蛾眉每見妬青蠅白璧
交相緣良材不得施大厦洪鐘勿使陳宮懸擠排百出言
絕醜小人自醜公何愆豈儒無知承後喙尙操筆舌噓殘

誕正如妖蟆蝕皎月終果帝腹膺無煎吾家徵君著函史
列公異教將毋偏我生恨不值公世親跪結鞶承雕鐫得
公此書如拱璧展對儼若公當前裝潢不敢妄題跋手香
肅拜熏濃煙召公甘棠鄭公笏肯同凡物輕流傳黃門先
生今謝元四十擁旄非偶然詩以爲壽當華筵願君一奮
黎水轅與公參駕爭後先再拜贈君千萬年

贈林方之

確齋子

零落天潢氣蕭條野客衫家風存苦茗生計托長機挺格
鬚眉健支貧骨相巉應嗤趙松雪身點玉堂銜

風雨山中至清談倍覺深孤燈搖夜幌亂葉響秋林白首
爲農意黃冠出世心相看不成寐拊缶一悲吟

呈邑令辭博學鴻詞之命

棕蕨桐帽芰荷衣齋閣頻年到若歸餘論竟霑牙齒潤高
風欲借羽毛飛三千水濶圖南路五月寒深臥雪扉賸有
床頭周易在白頭研露釋知幾

江花零落渚雲秋豐草長林擅一邱擊壤雅能隨父老高
眠敢爾傲王侯淮南叢桂歌招隱楚客離騷賦遠遊明日
浮蹤何處問三山明月五湖舟

臚腹相需本不多衡門兩板帶溪河楚人服食優蘭菊山
鬼衣裳秀薜蘿滿壁煙霞遊嶽記百年寤寐考槃歌廟堂
不少夔龍佐敢與清時補澗阿

秀先字冰持號地山新建人乾隆元年進士授
修官至禮部尚書諡文恪

玉芝

稔感敷神草幽元洞孝經仙人渺蹤跡芝閣闕穢形玉葉
雲心冷瓊盤雨意冥可堪四十載灼灼未凋零
先大父羅溪居憂時
土室中曾產
靈芝數本

蘇竹

碧玉寒無色春風夜有聲竿頭潛舊泪个字紵餘生羊角
扶雙翼龍孫映一泓笋枝幽恨迸終古蘊哀情

桂苗

枯根悲手澤慘見鬱新林復此小山曲何如鷺嶺岑韓終

仙易老桂父術難尋痛想泉臺下留茲忍死心

蘭蓀

九畹滋東圃芳蓀不忍看所生驚鄭夢遺事泣丁蘭露拂
青旗捲風吹碧影攢無人駐空谷對此輒心酸

陰雲

欲雨復不雨雲氣鬱寒陰颼颼遠風起飄散吹平林陽烏
斂飛鰭高隱層霄岑韜光黜外視而無塵埃侵自然得所
養沐浴江海濔此時如水鏡罔象堪幽尋

夜行

銀河橫七夕林鵲噪三更獨樹如人立圓沙與月明

雄縣舟中

繞城一水自彎環野色雲容各自閒便當乘槎溯天漢眼
中少箇是名山

途中雜詠

古道垂楊雨幾巡披襟剛是晚涼新平生愛讀秋聲賦聽
到蟬吟亦可人

凌之調

之調字廣心號惕園新建人乾隆元年進士官工
部主事應博學鴻詞試尋乞養歸著有易論丹麓
山居前後稿

少保馬文毅公彙草辨疑

聞昔顏魯公忠烈炳天下筆儼端人書法絕韶媚昭代

馬公起遼陽毅節剛風事一致胸蟠百萬氣吐虹節鉞巖
疆膺重寄桂林表裏倚長城戶慶更生羣盜避物衆地大
芽孽生無端變起蕭牆內是時三桂叛湖南延齡附起張
聲勢攻殺都統肆機槍執公囚室遭幽繫公身信是百煉
鋼多方煽誘鋒益厲後先不屈殉以身合室完操天日誓
當其困守圍城中瀝血三疏字字淚間關伏闕骨肉分一
腔忠愛神所誌兩賊相猜不克終逆孫就縛吳旋殪拯民
水火民見休赫濯公靈寶默庇辨疑一錄傳公神歷劫彌
光人嘆異鬼神呵護蛟螭盤筆墨尙挾風雲氣經天緯地
是雄文發篋風生使人畏公能辨疑始無疑磊落軒昂昭
人義凜凜如生手澤存百世奉之爲重器

送朱桐岡之任迤西巡憲

十年諫草凜朝綱
豔說天門九采翔
鐵柱于今威六詔
壽蒲在昔動三光
地臨緬甸關逾壯
業溯昆明劫未荒
奮武揆文資遠計
勲名萬里正悠長

黃永年

永年字靜山號崧甫廣昌人乾隆元年進士授刑部主事薦舉博學鴻詞以授職不復與試歷轉郎中奉使決江南獄遷鎮江知府改常州著有白雲詩鈔奉使集

感興

魯國有文學游夏寧爲文周季與漢京作者始紛紜尙涵

大圭容未覩彫琢痕指事爲時作述經尊所聞篇約取精
多曷嘗濫其垠東都漸質弊浮靡極梁陳韓子起八代五
原實大醇宋興歐曾輩含咀懷周殷數子已華勝高者翼
皇墳浴下述鄒魯五緯煥秋旻茲事有真宰興耗非無因
在茲爲道存道至文乃珍便便富辭章尋條迷本真况乃
稗販多煙消詎堪焚魯叟從先進吾敢瀉其淳

杪秋十一夜月懷蘭谷侍御

秋月湛流光霜嚴月更美高齋滅華燭庭院如積水懷
此時吟對月良未已妙氣棲靈襟冥然一無始

述懷答王毅齋侍御

庭樹何纂纂瓜蔓亦蕤蕤風燕舞新巢雨螢照暗壁撫玄

物景遷悵彼流光亟生人無根蒂不如堅樹殖樹古還春
華人老非壯力逝矣不可追天運渺何極宣尼夢周公吾
衰增歎息

詠古

洙泗刪述成經筆始告備豈謂咸陽灰早兆端門字大明
天方中一陰姤已始聖作幾時完破散東出彗天道豈虧
盈斯文竟喪墜江河萬古流莫救咸陽燧詩書燒爲塵諸
儒心未熾諸儒心焚如六經真掃地

嬴氏世詐力首功定九州長平四十萬戰血紛漂流不嗜
殺能一斯言信符不天眷已汧渭冥冥皇古愁惜哉鄒孟
叟仁義干諸侯著書述王道欲以反手收豈知世變異言

言皆盾矛聖知不燭世鼓萬肯同憂

綠萼梅次韻

南枝非故土看去幾思鄉在遠春初接含情天一方碧雲
千里暮澹月九疑裝疎影華堂裏微吟及妙香

重九前風雨感懷

節又重陽近鄉關祇夢經西風庭榭寒菊雨冥冥茲夕
南鄰杵秋燈不耐聽老親念京洛多少鬢華星

同諸執集體齋宅時園桃盛放

拚醉花間酒深憐碧樹枝月從今夕照人是隔年期院落
春光滿天虛妙氣滋東風無檢束寄語莫輕吹

秋夕漫興

秋風一夕淨窗紗
肺氣才蘇病齒牙
高館夜涼何處笛
月
林人靜晚歸鴉
料錢算日看梁屋
減客連朝屏畫又
欲學
子瞻慳未得更消
經費買盆花

送陳元若出督糧儲湖北

朱旛初建領儲胥
江漢風清逐隼旟
盡放胷懷收七澤
還
滋蘭蕙慰三閭
書生飛輓勞軍國
侍從聲名在玉除
更羨
白華吟咏好雍雍
調膳武昌魚

中秋月下咏懷

秋氣中分候青天
纖翳除江湖彌浩
渺樓閣入清虛
羈宦
思鄉淚平安遠道
書往情憶子舍茲
夕樂何如

劉蘭谷侍御過訪次韻

公退理閒獨蕭散適遠心叩門喜君來悠然相與深意悅
已忘言茲意何古今同遊愧述作希音聆遠吟常恐芳情
散不得葆冲襟秋英儻可薦君暇時來臨

送別王毅齋侍御歸雲南

夙有遺榮志秋風嘶去驄驪歌紅葉裏祖席雁聲中金碧
重開處雲霞一徑通前期名嶽興渺渺復誰同
依隱諾方朔忘機羨漢陰浮雲千載事流水一生心別後
勤書問相思多滯淫勞山吟眺外清聽阿戎琴

用蘭谷東毅齋韻

那許緇塵外忙中得許閑片雲遲大莫流水澹空山自置
身千仞長懷屢萬間烏臺數君子風誼可容攀

送高守邨回劍川

長風吹秋鴈飛急嶽色亭亭倚天立贈君五馬珊瑚鞭玉
輝命爾還南滇天池老鵬飛不怒北海南溟一息度蒼然
議論識時務大笑腐儒墮煙霧掩遏不使精悍露恩威大
體被諸夷西南地盡邊之陲養以兒子猷以徽好人怒獸
皆可治山茶殷紅大如斗花樹十圍蔭一畝花時燕樂羣
飲酒躋堂擊鼓爲上壽別君十八年日月如流川京華此
會亦草草高歌聊爾慰懷抱蒼梧木下洞庭波昔日芳草
今如何爲我投詩問汨羅畹蘭畹蕙樹則那神龍爲魚鰕
不得致靈雨監子弄雷電流漂汨九土九潦丈人噤無語
坐令陰陽紛錯迕下民其咨聞自古時平須仗濟時才爲

邦結輩君能儕別後新詩佇却寄匆匆幽思良難裁

寄蘭谷

故人飲已去月高參井闌虛白羣籟寂空齋澹澄觀冲襟
自幽獨坐久衣裳單聊將一夕思緘之寄古歡

春日小集次蘭谷韻

芳風被郊甸佳晨諧素襟芬華方斂釀愛此氤氲心清尊
無拘束言笑還獻斟并將山水意寄之無絃琴溫溫數君
子懷抱良所欽梅花探明月北枝春已深

遊秀峯寺觀黃巖瀑布遂登中主讀書臺讀陽明紀
功碑

秀峯之勝何龍提我來直跨雙白龍看此倒瀑飛下千仞

之高峯峽聲無威雷電死惟見石髓瀟瀟搖青空觀之了
未壯人意反覺百口贊諛多雷同捫竒扶磴瞰峽底僧言
下有千歲馮夷宮盤石縱橫字如斗按名稽代疑鴻濛薄
天山骨苦鑱琢好事毋乃多心聳謫仙已去老坡歿元氣
日泐天無功一逕轉蒙密豁目增峯鬼嗚呼新建功石保
大書臺塵跡荒荒何有哉丈夫扶世一時事安用片石埋
蒿萊不見香爐錦屏日羅列盡閱千古萬古魁偉之竒才
仰看山頭亭亭特立之古碣俯視澗底鬱鬱合抱之古松
山風吹濤秋壑響我心迴薄嗟奚從男兒三十不稱志便
當潮海釣長虹不爾茅廬促膝希隆中無使此山空負雄

張睢陽廟

江西詩徵

卷七十三

國朝九

辛

睢陽祠廟倚江干玉座緋衣鎮豬澗郭李後居唐閬闔南
雷時共節艱難指揮十口中原復辛苦孤城百戰殘典祀
明禋今重肅東風蘋藻薦靈壇

積雨

水國晝多晦吳山曉易雲雨深滋蔓草日落聚飛蟲氣入
衣衫默炎蒸戶牖薰漸移南北候天地本氤氲

黃世成

世成字培山號平庵信豐人乾隆元年進士官禮
部主事薦舉博學鴻詞以乞假歸未與試著有平
庵詩集

別詩

浮生如萍蓬飄泊隨所止山川杳千萬聚散不在已行身
雖異超江海忘魚水燕婉暫斯席一去綿道里酒行不及
三安坐且勿起

月夜獨酌

明月揚素輝正與軒窗對舉觴酌青天數杯已復醉風葉
光凌亂煙霧披飄飄頽然臥前簷倒觀星辰碎始覺覆載
寬遺形同委蛻浮雲本無心晨昏迭相代得意便高歌古
人復誰在

峽山飛來寺

東峽湏流駛嵌空遠谷開山都成壁立寺亦訝飛來禪石
依崖正靈泉瀉壑哀穿雲緣絕磴停棹一徘徊

都門雜詠

西直門西度

翠華圓明別院曲欄遮微風飄絮河橋柳赤日轟雷石路
車亭館碧交雲水地麥畦青抱野人家近天山黛陰晴在
長映仙宮作彩霞

驛鹽道李公韻南道蘇公巡撫阿公欲以經學薦敦
趣余歸感而成詠

上官真有愛才心日夜徵書降故林小艇江南帆未轉春
風嶺北夢徒深百年何意煩三聘一札真堪抵萬金欲倩
悲慙報知己

清時未敢濫華簪

和黃靜山月夜見懷韻

明月尋戶入虛白凝寒水興發震高空浩歌殊未已美人
倘同懷結願從茲始

湯奕雋

奕雋字彥叅南豐人儼子乾隆元年舉人

雜詠

鼠或產於火兔亦能食鐵草木類成妖蟲豸恒作孽誰敢
褻蛟龍蟠泥有魚鱉何如縮毛蝟殺虎入耳穴羣小雖同
惡功罪宜區別疾蠹無已甚天生難滅絕

胡盛槐

盛槐字植三新城人乾隆元年副貢

舟過青泥

舟過青泥口行人在畫中
草肥鷗鷺隱花落水雲紅
茆屋藏深樹平疇見遠風
溪山多好景憑眺意無窮

滕王閣秋眺

吳楚天高日夜浮
瞰江一閣聳南州
投書渚冷餘衰草
洗馬池荒占野鷗
老樹風翻紅葉下
前山雨過白雲流
碧空未許塵飛到
人在清虛上界樓

江西詩徵卷七十三